



20 Jun 2014
20 June 2014
P.U. (A) 166

WARTA KERAJAAN PERSEKUTUAN

FEDERAL GOVERNMENT GAZETTE

PERINTAH CUKAI PENDAPATAN (PENGEQUALIAN) (NO. 2) 2014

INCOME TAX (EXEMPTION) (NO. 2) ORDER 2014



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA CUKAI PENDAPATAN 1967

PERINTAH CUKAI PENDAPATAN (PENGECUALIAN) (NO. 2) 2014

PADA menjalankan kuasa yang diberikan oleh perenggan 127(3)(b) Akta Cukai Pendapatan 1967 [*Akta 53*], Menteri membuat perintah yang berikut:

Nama dan permulaan kuat kuasa

1. (1) Perintah ini bolehlah dinamakan **Perintah Cukai Pendapatan (Pengecualian) (No. 2) 2014**.

(2) Perintah ini disifatkan telah mula berkuat kuasa dari tahun taksiran 2011.

Tafsiran

2. (1) Dalam Perintah ini—

“aktiviti yang layak” ertinya mana-mana aktiviti yang berikut, dijalankan oleh orang yang layak dalam Kompleks RAPID:

- (a) pengadunan, pemprosesan atau pemecahan minyak mentah, kondensat, suapan atau suapan pertengahan;
- (b) pengeluaran, pembuatan atau pembangunan keluaran petroleum, petrokimia, kimia, produk pertengahan, akhir atau pengeluaran berkaitannya;
- (c) penyimpanan, perumusan, pengadunan, pengagihan atau pemasaran petroleum, petrokimia, kimia, produk pertengahan, akhir atau pengeluaran berkaitannya;
- (d) pengegasan semula LNG kepada gas dan pengagihannya yang relevan; atau

- (e) penjanaan, pengagihan atau jualan semua bentuk utiliti termasuk tetapi tidak terhad kepada elektrik, air, wap, gas, hidrogen, udara atau pengolahan bahan buangan;

“Kompleks RAPID” ertinya suatu kompleks yang mengandungi loji pemecahan cecair, loji penapisan, loji petrokimia atau pengeluaran kimia dan semua kemudahan sokongan dan tambahan termasuk tetapi tidak terhad kepada cecair gas asli (LNG), Terminal Penerimaan dan Pengegasan Semula (RGT), loji berkuasa COGEN, kemudahan penyimpanan atau kemudahan pengolahan bahan buangan, dan terletak di Pengerang, Johor;

“orang yang layak” ertinya—

- (a) Petroliam Nasional Berhad;
- (b) mana-mana syarikat lain yang diperbadankan di bawah Akta Syarikat 1965 [Akta 125] yang Petroliam Nasional Berhad memegang sekurang-kurangnya lima puluh satu peratus modal berbayar dalam saham biasa; atau
- (c) mana-mana syarikat lain yang diperbadankan di bawah Akta Syarikat 1965 yang menjalankan aktiviti yang layak dalam Kompleks RAPID yang Petroliam Nasional Berhad memegang, sama ada secara langsung atau tidak langsung, saham biasa dalam syarikat itu;

“tempoh pengecualian” ertinya tempoh orang yang layak diberi pengecualian daripada pembayaran cukai pendapatan di bawah Perintah Cukai Pendapatan (Pengecualian) (No. 7) 2013 [*P.U. (A) 41/2013*].

(2) Bagi maksud Perintah ini, “RAPID” adalah singkatan bagi Pembangunan Integrasi Kilang Penapisan Minyak dan Petrokimia.

Pemakaian

3. Perintah ini hendaklah terpakai bagi orang yang layak yang telah membuat suatu permohonan bertulis berkenaan dengan aktiviti yang layaknya kepada Lembaga Pembangunan Pelaburan Malaysia dalam tempoh sembilan puluh hari sebelum tempoh pengecualian di bawah Perintah Cukai Pendapatan (Pengecualian) (No. 7) 2013 tamat.

Pengecualian

4. (1) Tertakluk kepada subperenggan (2), Menteri mengecualikan orang yang layak pemastautin di Malaysia daripada bayaran cukai pendapatan berkenaan dengan lima puluh peratus daripada pendapatan berkanunnya yang diperoleh daripada aktiviti yang layak bagi tempoh lima tahun taksiran berturut-turut bermula daripada tahun taksiran dalam tempoh asas sebaik selepas tempoh pengecualian (selepas ini disebut sebagai “tahun taksiran yang dikecualikan”).

(2) Pendapatan berkanun yang disebut dalam subperenggan (1) dalam tempoh asas bagi setiap tahun taksiran hendaklah ditentukan selepas memotong elaun yang boleh diberikan di bawah Jadual 3 Akta walaupun tiada tuntutan untuk elaun tersebut dibuat.

(3) Dengan syarat bahawa jika aset yang digunakan bagi maksud suatu aktiviti yang layak yang disebut dalam subperenggan (1) juga digunakan bagi maksud suatu aktiviti atau projek, sebagaimana yang berkenaan, selain aktiviti yang layak itu, maka elaun yang boleh diberikan di bawah Jadual 3 Akta hendaklah dipotong sebagaimana yang munasabah dengan mengambil kira kepada setakat mana aset itu digunakan bagi maksud aktiviti yang pertama disebut.

(4) Tiada apa-apa jua dalam subperenggan (1) boleh melepaskan atau disifatkan telah melepaskan orang yang layak itu daripada mematuhi apa-apa kehendak untuk mengemukakan apa-apa penyata atau penyata akaun atau memberikan apa-apa maklumat lain di bawah peruntukan Akta.

Kerugian

5. (1) Apa-apa amaun kerugian larasan yang ditanggung daripada aktiviti yang layak sebelum atau semasa tahun taksiran yang dikecualikan di bawah Perintah Cukai Pendapatan (Pengecualian) (No. 7) 2013 dan Perintah ini, hendaklah dibawa ke hadapan dan dipotong terhadap pendapatan berkanun bagi aktiviti yang layak yang disebut dalam subperenggan 4(1) dalam tahun selepas tahun taksiran yang dikecualikan sehingga aktiviti itu menggunakan semua amaun kerugian larasan yang ke atasnya ia berhak.

(2) Sekian banyak daripada kerugian larasan yang telah digunakan untuk mengurangkan pendapatan berkanun bagi aktiviti yang disebut dalam subperenggan 4(1), dalam tahun selepas tahun taksiran dikecualikan tidak boleh diambil kira bagi maksud subseksyen 43(2) dan 44(2) Akta.

Sumber dan akaun berasingan

6. (1) Jika orang yang layak menjalankan suatu aktiviti yang layak yang disebut dalam subperenggan 4(1) dan aktiviti lain atau projek di dalam atau di luar Kompleks RAPID, setiap aktiviti atau projek itu hendaklah dianggap sebagai suatu punca aktiviti atau perniagaan berasingan dan berlainan.

(2) Orang yang layak yang dikecualikan di bawah subperenggan 4(1) hendaklah menyenggara akaun berasingan bagi pendapatan yang diperoleh daripada aktiviti yang layak yang disebut dalam perenggan itu.

Syarat

7. Pengecualian cukai atas pendapatan berkanun bagi aktiviti yang layak yang disebut dalam subperenggan 4(1) adalah tertakluk kepada syarat sebagaimana yang dinyatakan oleh Lembaga Pembangunan Pelaburan Malaysia dalam surat kelulusan bagi permohonan yang disebut dalam perenggan 3.